



Schampagn sco apéritif, quai tutga tar ena tala occurrenza.



Reto Mathis, il president dals events, cun «Maître Antony», l'uschenumnà papa dals chaschiels.



Piculezzas finas da buna qualitat per ils mangiabains.



Ariane Ehrat, directura turistica da San Murezzan, flancada dals dus hoteliers Urs Höhner (san.) e Felix Dietrich.



L'avertura ha gi lieu en la sala dal Kempinski Grand Hotel des Bains a San Murezzan.



Ils cuschiniers da la Gronda Britannia cun lur collegas dals hotels da luxus a San Murezzan.

FOTOS A. METTLER

Glamurus sco tar ils Englais

Gourmet Festival San Murezzan

DA GION NUTEGN STGIER / ANR

■ **Las occurrenzas culinaricas attiran er da preschent numerus mangiabains en ils hotels da luxus a San Murezzan e vischinanza. Ils cuschiniers da la Gronda Britannia conferman che er sin quella insla ha la cuschina fina en il fratemp in post fix.** Il Gourmet Festival a San Murezzan tutga tar in da quels da la classa superiura e quai puncto qualitat e varietad culinarica. Per persunas da bucca fina e nas fin è l'Engiadin'Ota gia in paradis, cun appartegnair quella region tar ina, cun bunamain 25 restaurants, che han 13 fin 18 «Gault Millau» puncts. Dapi 20 onns vegnan a la fin da schaner cuschiniers da l'entir mund a San Murezzan e chaschunan cun lur cuschina extraordinaria che la purschida culinarica vegn anc pli singulara. Esser da la partida al Gourmet Festival è per mintga cuschiner da renum internaziunal, blier dapli che be onur. Ils mangiabains vegnan lura er en rotscha e quai schizunt per singuls cuschinunzs che datan cun lur cuschina particulara novs

impuls a la gastronomia en l'Engiadin'Ota. Numerus giasts vegnan ming'onn be pervia da l'emna culinarica a San Murezzan per giudair las bunas tratgas, l'atmosfera speziala e lura er il glamur che tutga tar ina occurrenza cun ina tala societad illustra.

Il pretsch è strusch in tema

Tar ils gourmets è il pretsch per esser da la partida a las 40 occurrenzas culinaricas strusch in tema. Vesair ed esser vesai è la devisa tar il Gourmet Festival, uschia ch'il pretsch è secundar. Per il pretsch da 45 francs fin 550 francs per occurrenza vegnan er purschidas aventuras culinaricas sco strusch tar in auter festival per mangiabains. La gronda parti è bain stada l'avertura dal festival en il Kempinski Grand Hotel des Bains a San Murezzan, nua che las 400 persunas èn stadas fascinadas da la glamur englausa ed anc pli fitg da las piculezzas finas e da bun gust dals ovg cuschiniers e da la cuschinunza da la Gronda Britannia. En tuttas modas e manieras in event culinaric cun in punct culminant suenter l'auter.

En cuschina tar ils cuschiniers

Ils diners da gala en ils hotels da tschingt stailas èn lura er adina ina part dal Gourmet Festival ed er qua vegn be servì il meglier ed il pli bun. Popularas èn lura er las diversas degustaziuns, saja quai da vins e schampagn, da grappas e liqueurs, da chaschiel e da charn sco er da tschigulatta ed auters dulstschems fins. Bunamain legendara è lura la uschenumnada «Kitchen Party» en il Badrutt's Palace hotel a partir da las 22.30, nua che tuts dastgan guardar als cuschinunzs en las padellas e gist degustar las bunas chaussas en il lieu (330 francs per persuna). La curuna per mintga participant da l'emna per gourmets è bain il grond final en il Kulm Hotel da damaun venderdi a partir da las 19.00. Da quell'oras cumenza il grond banchet da gala, (550 francs per ina persuna), nua ch'i vegn servì in menu cun divers plats e quai en la sala, decorada da festa a la moda englausa, da l'hotel da luxus. Mangià vegn al «Table d'Hôte», vul dir tuts èn tschentads communaivel a maisa e sa laschan ir bain cun tratgas da buna qualitat che vegnan preparadas quest onn dals cuschiniers da l'Engalterra. Bun appetit!



Schampagn sco apéritif, quai tutga tar ena tala occurrenza.